



DANI SIGURNOSTI
MEĐUNARODNA LJETNA ŠKOLA
UPRAVLJANJE U KRIZNIM SITUACIJAMA
SARAJEVO 13 – 16. 5. 2022.

WWW.SUMMERSHOOL.BA



1.

Uvod

Međunarodna ljetna škola – Upravljanje u kriznim situacijama će biti realizirana kroz šest modula koje će pohađati studenti našeg fakulteta i studenti Veleučilišta Velika Gorica iz Republike Hrvatske. Shodno uvjetima i mogućnostima škola će biti otvorena i za učešće određenog broja studenta s fakulteta iz zemalja okruženja ili iz Bosne i Hercegovine, oni koji iskazuju interesiranje. Škola će biti realizirana kroz dva pristupa, teorijski i praktični sa naglaskom na praktični dio gdje će studenti vođeni mentorima uzeti više aktivnosti u realizaciji pripremljenih zadataka. Program ljetne škole (teoretski dio) će biti realiziran na Fakultetu za kriminalistiku, kriminologiju i sigurnosne studije i jednim dijelom u prostorijama Općine Novo Sarajevo, a praktični dio (vježbe) u okviru Kampusa Univerziteta, pješačke zone Vilsonovo šetaliste ili na brdu Humu, shodno vremenskim uvjetima. Sve aktivnosti škole će biti shodno epidemiološkoj situaciji i preporukama ponašanja za dato vrijeme.

2.

Opis ljetne škole

Akademski program – „Međunarodna ljetna škola – Upravljanje u kriznim situacijama“ ima za cilj sticanje znanja o pojmovima kriza i katastrofa, znanja koja će omogućiti sticanje kompetencija i vještina za planiranje mjera i aktivnosti za sprečavanje i suzbijanje kriza, učinkovitije upravljanje krizama, djelovanje i komuniciranje u uvjetima krize / katastrofe, saniranje krizom nastalih posljedica za ljude i materijalna dobra, zaštitu života i psihosocijalno zbrinjavanje ljudi pogođenih krizama / katastrofama, profesionalnog osoblja i žrtava, te prevazilaženje kriza i katastrofa. Pojam upravljanja krizama (Crisis Management) novijeg je datuma i predstavlja posebno područje menadžmenta. Riječ je o pojavi koja se iz tradicionalne vojne sfere preselila u civilno područje, te predstavlja sastavni dio funkcioniranja civilnih institucija, jer su rizik i kriza (stvarni ili potencijalni) sastavni dio ljudske svakodnevnice. Štaviše, o važnosti instituta upravljanja krizama dovoljno govori činjenica da su mnoge države širom svijeta ustanovile posebne vladine agencije (npr. američka Savezna agencija za upravljanje krizama/Federal Emergency Management Agency), a neke čak i ministarstva (Ruska Federacija), s ciljem razvijanja i integriranja nacionalnih kapaciteta za efikasno upravljanje krizama.

2.1.

Kompetencije

Kompetencije završenih polaznika ovog programa „Međunarodna ljetna škola – Upravljanje u kriznim situacijama“ su planiranje i provođenje preventivnih mjera za sprečavanje i ublažavanje posljedica kriza, te pružanje stručne pomoći i koordinacija stručnih timova i opreme nakon krize ili katastrofe.

2.2.

Praktični dio nastave

Praktični dio nastave programa ljetne škole „Međunarodna ljetna škola – upravljanje u kriznim situacijama“ provodi se u saradnji s odgovarajućim institucijama državne uprave (Federalna uprava civilne zaštite, Služba za civilnu zaštitu Općine Novo Sarajevo, Gorska služba spašavanja, Crveni križ), kao i mnogim drugim predstavnicima agencija za upravljanje kriznim situacijama iz regiona i EU.

2.3. Organizator ljetne škole

Organizator „Međunarodne ljetne škole – Upravljanje u kriznim situacijama“ je Fakultet za kriminalistiku, kriminologiju i sigurnosne studije Univerziteta u Sarajevu, Bosna i Hercegovina, Veleučilište Velika Gorica, Republika Hrvatska i Općina Novo Sarajevo.

2.4. Program ljetne škole

Program „Međunarodne ljetne škole – Upravljanje u kriznim situacijama“, se sastoji od šest obaveznih kolegija / modula (I Osnovi sigurnosti, II Krizne situacije, III Upravljanje kriznim situacijama, IV Krizno komuniciranje, V Alpinizam, GIS i prva pomoć, VI Komandna organizacija), od kojih će dva kolegija / modula (V i VI) biti realizirana kroz praktičnu nastavu. Program ljetne škole bit će realiziran kroz teoretska predavanja, interaktivni rad u malim grupama, plenarne rasprave. Ukupno opterećenje polaznika „Međunarodne ljetne škole – Upravljanje u kriznim situacijama“ je 80 sati raspoređenih kroz 36 kontakt sati, 20 sati predviđenih za vježbe, 24 sata su namijenjena za čitanje obavezne i dopunske literature, kao i za izradu završnog rada. Opterećenje studenata izraženo u ECTS bodovima, iznosi 3 ECTS boda. Nakon završetka programa ljetne škole i izradom završnog rada, polaznici će biti osposobljeni za razumijevanje procesa upravljanja kriznim situacijama u zavisnosti od uzroka i mjesta nastanka. Također, polaznici će biti osposobljeni za razumijevanje organizacije prevencije krize, pripremu djelovanja i djelovanje tokom krize, kao bitan faktor u odlučivanju u organizacijama, organima lokalne uprave i samouprave, kao i organima državne uprave. Program „Međunarodne ljetne škole – Upravljanje u kriznim situacijama“ bit će realiziran rna Fakultetu za kriminalistiku, kriminologiju i sigurnosne studije Univerziteta u Sarajevu, kroz teoretske radionice i praktične vježbe.

2.5. Opis kolegija / modula programa ljetne škole

I MODUL – Osnovi sigurnosti

Cilj ovog kolegija / modula je upoznavanje polaznika programa s najčešćim uzrocima nastanka nesreća, oblicima, izvorima i posljedicama nesreća, izvorima ugrožavanja relevantnih za nastanak krize, odnosno katastrofe, antropogene nesreće i katastrofe. Upoznavanje polaznika s karakteristikama manifestacija i posljedica koje izazivaju antropogene katastrofe, procjene ugroženosti i planovi zaštite i spašavanja, preventivni postupci, sistemi upozorenja, obavještanje i uzbuñjivanje stanovništva. Isto tako, polaznici ovog programa / kursa, kroz I MODUL bit će upoznati i s pojmom i zadacima civilne zaštite, ulogom civilne zaštite u sistemu nacionalne odbrane, zadacima civilne zaštite u ratu i tokom kriznih situacija, sistemom civilne zaštite, pravnim uređenjem civilne zaštite u BiH i EU. Ovaj modul će biti realiziran kroz šest kontakt sati.

II MODUL – Krizne situacije

Cilj ovog kolegija / modula je upoznavanje polaznika programa sa uzrocima nastajanja kriza i katastrofa, krize sa stajališta pojedinca, preduzeća, organizacije, države, te svrha upravljanja kriznom situacijom, prevencija, preživljavanje i uspješan izlazak. Kriteriji uspjeha, upravljanje u uvjetima krize, ciljevi upravljanja kriznim situacijama, izgradnja upravljačkih sposobnosti za ovladavanje nepredvidivih događaja, modeli upravljanja krizom i kriznim situacijama, planovi informiranja, sredstva za intervenciju. Ovaj modul će biti realiziran kroz šest kontakt sati.

III MODUL – Upravljanje kriznim situacijama

Cilj ovog kolegija / modula je metodologija izrade procjena ugroženosti za pojedine vrste katastrofa, metodologija izrade planova zaštite od pojedinih vrsta ugrožavanja, izrada planova djelovanja na pojedinim stepenima; sadržaj i pojam operativnih planova zaštite i spašavanja; metodologija i praktični primjeri provjeravanja planova i njihove primjene; povratno informiranje kao bitan element kriznog planiranja. Isto tako, polaznici ovog programa / kursa će se kroz III MODUL upoznati i sa planiranjem, upravljanjem logističkom podrškom, utjecajem logističkog procesa, logistikom u vježbama i operativnim akcijama. Ovaj modul će biti realiziran kroz šest kontakt sati.

IV MODUL – Krizno komuniciranje

Cilj ovog kolegija / modula je upoznavanje polaznika sa značajem komunikacije uopće i u kriznim i izvanrednim situacijama posebno, konceptima risk i kriznog komuniciranja, risk komuniciranjem kao alatom u ispravnoj percepciji i realnoj procjeni rizika i prevenciji kriznih / vanrednih situacija, *tehničkom* (uređaji, oprema, sistemi i sredstva veze, alternativni načini komunikacije u kriznoj/izvanrednoj situaciji) *operativnom* (davanje upozorenja i zapovijedi građanima, pravnim licima / osobama i drugim subjektima, umirenje javnosti) i *percepcijskom* (oblikovanje značenja odnosno javne i medijske percepcije krize) dimenzijom kriznog komuniciranja. U kontekstu navedenih tema posebna pažnja bit će posvećena definiranju ciljnih javnosti, strategijama risk i kriznog komuniciranja i izradi odgovarajućih planova, alatima risk i kriznog komuniciranja (odnosi sa medijima, intervjui, saopćenja, konferencije za štampu, korištenje interneta i socijalnih mreža, organiziranje specijalnih događaja itd), praktičnim komunikacijskim vještinama, komuniciranju sa unutrašnjom javnoću, te specifičnim percepcijskim krizama koje sa javljaju u medijskom odnosno virtuelnom prostoru. Ovaj modul će biti realiziran kroz šest kontakt sati.

V MODUL – Alpinizam, GIS i prva pomoć

Cilj ovog modula je upoznavanje polaznika programa s osnovama alpinizma, penjanjem po osiguranoj planinarskoj stazi, penjanjem po sistemu „top rope“, sidrišta, upotrebom penjačkih kompleta, usponima u vodstvu, penjanjem u navezima. Isto tako će se polaznici ovog programa / kursa, kroz V MODUL upoznati i sa zbrinjavanjem traumatskih povreda: sigurnost na mjestu nesreće (lična, opća, službe), povrede (podjela, sile), krvarenje (vanjsko, unutrašnje), hemostaza, prijelomi (vrste, otvoreni, zatvoreni), imobilizacije, termičke povrede, opekotine i smrztotine, toplotni udar, iscrpljenost, sunčanica, način transporta, transportna sredstva, padovi sa visine, povrede kičme, ujedi insekata i gmizavaca, balast povrede, povrede vatrenim oružjem. Polaznici ovog programa/kursa kroz V MODUL će biti upoznati i sa osnovama topografije i GPS navigacijom: upotrebom i vrstama kompasa, kartama i orijentacijama karata, koordinatnim sistemima, razmjerama karata, određivanjem koordinata na karti, određivanjem položaja na terenu uz pomoć karte i kompasa, orijentacija i kretanje u prostoru uz pomoć GPS-a, upotreba spremljenih ruta kretanja, pravljenje i spremanje ruta kretanja, ažuriranje mapa. Ovaj modul će biti realiziran kroz deset sati praktičnih vježbi.

VI. MODUL – Komandna organizacija

Cilj ovog modula je upoznavanje polaznika programa s razvojem komandne organizacije, elementima organizacije komandnog rada, timskim metodama rada komande, oblicima organiziranja timskog rada, veličinom tima i njegovim sastavom, procesom donošenja odluka, procesima planiranja, predviđanja, odlučivanja, izradama plana djelovanja. Ovaj modul će se realizovati kroz 10 sati praktičnih vježbi.

3. UVJETI ZA UPIS POLAZNIKA LJETNE ŠKOLE

Uvjet za upis „Međunarodne ljetne škole – Upravljanje u kriznim situacijama“ je završena srednja četvorogodišnja škola, gimnazija, svršeni studenti (I,II i III ciklusa studija), ili studenti koji trenutno pohađaju studijski program prvog, drugog ili trećeg ciklusa studija društvenih, tehničkih, humanističkih ili prirodnih nauka.

3.1. Obaveze polaznika ljetne škole

Obaveze polaznika „Međunarodne ljetne škole – Upravljanje u kriznim situacijama“ su obavezno pohađanje nastave i vježbi i izrada završnog zadatka.

3.2. Opterećenje polaznika i završni ispit

Procjena opterećenja studenata:

- Ukupno 80 sati (**3 ECTS**)
- 1.36 kontakt sati (5 sati dnevno) – **1,5 ECTS**
- 2.20 sati vježbi (3 sata dnevno) – **0,5 ECTS**
- 3.24 sata čitanja i izrada završnog rada (3 sata dnevno) – **1 ECTS**
- Način provjere znanja: Izrada grupnog završnog zadatka

3.3. Diploma/Certifikat

Nakon ispunjenih svih obaveza definiranih silabusom programa „Međunarodne ljetne škole – Upravljanje u kriznim situacijama“, polaznicima koji su stekli uvjete bit će dodijeljena diploma / certifikat Fakulteta za kriminalistiku, kriminologiju i sigurnosne studije Univerziteta u Sarajevu.